

# Nin raroopa dxihtsi nin baca'h San Pehdru

GuelrgahpaDxiohs Pehdru  
para la'h ra' xpwiinn Crixtu

**1** Na'h nin naan Simohn Pehdru,  
ru'nnahnn xtsi'n Jesucristu  
nee naa zahn tuhbi pooxtla xteenn  
Ñi'h; ruca'hñ dxihtsi rii' loh tu  
ziga naa tu xpwiinn Jesucristu  
nin riachii sto' ra' ñi'h xchi'dxyi  
Dxiohs talpa'h ziga riachii sto' nu  
xchi'dxyi Dxiohs nin rusiaa xtuhlda  
nu'h pur lah Jesucristu. <sup>2</sup>Rna'ba'hn  
loh Dxiohs gacanee cha'yí ru Ñi'h  
la'htu; cun gusacwachidxyi ru  
Ñi'h lasto' tu tin gacabwa' ru tu  
xchi'dxyi Dxiohs neezaa Daada  
Jesucristu.

**Ziga nahpa gaca ra'**  
**xpwiinn Jesucristu**

<sup>3</sup>Laasii xquelrnabwa' Dxiohs  
bani'hi garaatii' nin rchi'hn nu'h  
tin guibahan za'ca nu'h, tin gaca  
nu'h bwiinn nayaan nez loh Ñi'h, pur  
xcweenta xchi'dxyi Ñi'h nin banaann  
za'ca nu'h xcweenta Jesucristu, nin  
gudihdxyi la'h ra' nu'h nee nin  
gulii la'h ra' nu'h tin bachica'ha ra'  
nu'h loh xquelña'ñih Ñi'h, <sup>4</sup>ya pur  
xcweenta ra' cohsa ra' rii' bani'hi  
Ñi'h dxyi'dxyi ra' rii' nin guchii nee

nin lasahca duxa la'h nu'h. Ya sidela  
chechii sto' nu'h xchi'dxyi Ñi'h,  
zahca gaca ra' nu'h xpwiinn Ñi'h  
nee zahca nu'h bwiinn za'ca ziga  
naa Ñi'h laasii basia'han nu'h nez  
dihtsi nu'h dzi'n dxaaba ra' nin rza'bi  
sto' snuhn ra' bwiinn guidxyiyuh  
loh ñi'h nee nin ruxi'n za la'h ra' ba.  
<sup>5</sup>Ni'chin nnah nahpa gacabwa' ru  
tu xa nabahan tu loh guidxyiyuh.  
Gulgui'hnn xa chioo ru guelriachii  
sto' xteenn tu nin gacanee la'htu  
tin guibahan za'ca tu loh Dxiohs;  
ya ziga guibahan za'ca tu chi ziroo'  
ru xcweenta xquelnaann tu loh  
dzi'n za'ca ra'. <sup>6</sup>Ya ziga guroo' naa  
xquelnaann tu xcweenta dzi'n za'ca  
cun dzi'n dxaaba, zahca guinabwa'  
tu tihx tu tin ayi guunn tu dzi'n  
dxaaba. Ya chin guinabwa' tu tihx  
tu, zahpa tu paseensi, ya chin ba  
nahpa tu paseensi, pwihsa zahca tu  
bwiinn za'ca, bwiinn saantu. <sup>7</sup>Ya  
chin ba naa tu bwiinn za'ca, bwiinn  
saantu, zahpa tu guelnadzii'hi  
lasaa', ya chin la'htu ba nahpa tu  
guelnadzii'hi lasaa' pwihsa ya nahpa  
tu guelnadzii'hi lasaa' nin naa  
xteenn Jesucristu.

<sup>8</sup>Ya sidela la'htu mahzi ru  
ruzo'badxiahga tu garaa ra' dxyi'dxyi

ra' rii', pwihsí xquelnabahan tu ayi naan guelnabahan lliaa' zi nee ayi biu'nbwa! lliaa'zi za tu la'h Daada Jesucristu, <sup>9</sup>laasii garaa ra' nin ayi nahpa ra' dxyi'dxyi ra' rii', naa bwiinn chi ziga zi nin naa dxie'pa loh ñi'h o gulliaa' riin loh ba, laasii bia'lدا sto' ba xa basiaa Dxiohs xtuhlda ba nin bwi'hnn ba galoh. <sup>10</sup>Pwihsí ni'chin rñi'n loh tu bwiitsi ra'n; gulgui'hnn nasihsí nee gulchi'hyi xa guluu'yiloh tu guchii gudihdxyi Dxiohs la'htu nee gulii Ñi'h la'htu, ya pur nin guzo'badxiahga tu xcweenta dxyi'dxyi ra' rii', pwihsí ayi chuu xa pur guñihchi tu o chuu xtuhlda tu. <sup>11</sup>Pwihsí sidela guibahan tu squii' loh guidxyiyuh rii', ziuu'tii tu loh guelrnabwa' nin naa par tu'pazi xteenn Daada Jesucristu nin bata'h la'hnu'h loh duhlda.

<sup>12</sup>Pwihsí ni'chin nin nahpa cheezah gusaza'hn sto' tu xcweenta dxyi'dxyi ra' rii', nicala banaann tun nee nicala za ya zeezah za'ca tu loh ra' dxyi'dxyi nanchii nin ba gwachii sto' tu. <sup>13</sup>Pwihsí loh gaduhbi nin nabahanahn loh guidxyiyuh rii' na'h ru'nnahn lligaaba xnehma naa ziga chin rusannaan sto' tu, tin zi'chi guñi'bi ru tu tin guunn tu ziga naa xnehma, <sup>14</sup>laasii la'h Daada Jesucristu ba baluu'yi na'h ze'ya'ngahxu dxyih nin tiidxi sa'hn loh guelnabahan rii'. <sup>15</sup>Ni'chin cayuhnn duuxa'hn dzi'n nnah, tin chin la'n ya ba guhchi, garaa dxyih ziagannasto' tu xcweenta dxyi'dxyi ra' rii'.

### Garaa ra' nin bwa'ha loh ra' guelnaza'ca xteenn Jesucristu

<sup>16</sup>Pwihsí guelruluu'yi nin baluu'yi nu xcweenta guelbia'ñih nee cun

xcweenta Daada Jesucristu, ayi naan cweenta nin bachidxi'nlaadzi nu cun xilla mahn ra', pwihsí la'hnu cun bizloh nu bidia'ha loh nu la'h Daada Jesucristu loh xquelrnabwa' roo' xteenn Ñi'h, <sup>17</sup>laasii bidia'ha loh nu chin badi'hi Daada Dxiohs nin nuu dxibaa' guelrnabwa' cun xquelña'ñih Ñi'h la'h Jesucristu chin bihn dxiahga nu guñi' Dxiohs la'n tuhbi xcahyi nin biinloh nez llaa'ndxibaa', rahbi Ñi'h: "Dee naa Llili'nahn nin nadzii'hihn, nin riahxi'hn xcweenta Ñi'h." <sup>18</sup>Pwihsí la'h gahca za nu bihn dxiahga nu rsiaa'ha xteenn Dxiohs nin bihn dxiahga nu nez llaa'ndxibaa', pwihsí tuhsí dxunee nu la'h Daada Jesucristu loh dahan nin naa yuh saantu xteenn Dxiohs.

<sup>19</sup>Pwihsí pur nin bwa'haloh nu nee pur nin bihn dxiahga za nu chi, ni'chin nin mahzi ru riachii sto' nu garaa ra' dxyi'dxyi ra' nin baca'h guehtu daada ra' nin guñi' xchi'dxyi Dxiohs. Pwihsí la'htu bwen naa xcweenta tu sidela guzo'badxiahga tu xcweenta xchi'dxyi Dxiohs nin baca'h ra' ba, nin naa ziga zi tuhbi bia'ñih nin rusia'ñih hasta nacahyi. Ya hastayi chin rarah gue'la chi'chi rtahn gubiadxii ruzia'ñih la'n lasto' tu. <sup>20</sup>Pwihsí ni'chin gulgahcabwa' dee': Galoh nin tuhbi dxyi'dxyi nin caa loh Xchihtsi Dxiohs, ayi nin tuhbi bwiinn nin gabwe'hecaa xi zee loh dxyi'dxyi chi cun ganaalla si xigaaba ba. <sup>21</sup>Pwihsí la'h ra' guehtu daada ra' nin guñi' xchi'dxyi Dxiohs, nin tuhbi bweelta ayi guñi' ra' ba pur xcweenta gahca ra' ba sino que guhca ra' ba bwiinn ra' nin guñi' xcweenta Dxiohs,

laasii guhcanee Spíritu Saantu Dxiohs la'h ra' ba.

Nin ruluu'yi ra' dxyi'dxyi ra' nin ayi  
naa guchii  
(Judas 3--13)

**2** Guyuu' za profeta ra' nin baluu'yi ra' dxyi'dxyi ra' nin ayi naa dxyi'dxyi guchii loh ra' bwiinn Israel ra'; pwihs i z'i'chi za loh tu ziuu' ra' mwehsu ra' nin ayi guluu'yi dxyi'dxyi nin naa guchii, ya la'h ra' ba rala'ngah sola guluu'yi ra' ba nin naa lligaba zi ra' ba, ya zibwe'he sto' ra' ba la'h Jesucristu nin bata'h la'h ra' ba loh duhlda, ya pur cweenta ra' rii' lwehgu ziñihchiloh ra' ba. <sup>2</sup>Pwihs ziahan ra' bwiinn ziana'hla ra' ba la'h ra' bwiinn ra' chi cun loh xneziuh dxaaba ra' ba, nee pur xcweenta za ra' bwiinn ra' chi ziahan ra' bwiinn ra' ziñi'nah ra' ba xcweenta xneziuh xchi'dxyi Dxiohs, <sup>3</sup>ya laasii rza'bi sto' ra' ba xmweeyi tu, zuluu'yi ra' ba la'htu xica dxyi'dxyi nin ayi naa dxyi'dxyi nin guchii ra', per ya nin naa xcweenta ra' ba naa ñichiloh ra' ba. Zi'chi chi'h zi naa rramwehdxi nin gaca la'h ra' ba, pwihs i ya desde cachieempa roo' la ya naa dxyi'dxyi ziñihchiloh ra' ba.

<sup>4</sup>Dxiohs ayi bwi'hnn Ñi'h pardonh xtuhlda ra' aanjla ra' nin guyuu' xtuhlda ra' ñi'h, sino que guxe'hla Ñi'h la'h ra' aanjla ra' chi para gabihldxi, ya basia'han Ñi'h la'h ra' aanjla ra' chi loh nacahyi, cadu'h ra' ba cun cadehn nee nuucha'y i ra' ba para hasta chin gacayi jwisi. <sup>5</sup>Nin ayi za bwi'hnn Dxiohs pardonh xtuhlda ra' bwiinn ra' nin bañihchiloh Ñi'h cun ñihsa, sola

gula'h guehtu Noeh si, nin baluu'yi xchi'dxyi Dxiohs la'n dxyih ra' chi cun zagahdzi ra' bwiinn. <sup>6</sup>Bwi'hnn za Dxiohs guelguxchisi xteenn Ñi'h loh guihdxyi Sodoma neezaa loh guihdxyi Gomorra; biuhn Ñi'h guihdxyi ra' chi ganaalla cobadeh, zi'chi bwi'hnn Dxiohs tin gacabwa' ra' bwiinn xa ruhnnee Dxiohs la'h ra' bwiinn ra' nin ayi ruzo'badxiahga xchi'dxyi Ñi'h. <sup>7</sup>Per bata'h Ñi'h la'h tuhbi ndxi'hw nin laa Lot, nin guhca tuhbi bwiinn za'ca loh guihdxyi chi, laasii bibiin lasto' ba chin bwa'ha ba zeza'bitii' ra' bwiinn guihdxyi ra' chi loh duhlda duxa nin na'hla ra' ba. <sup>8</sup>Pwihs i la'h Lot nin naa bwiinn za'ca rii' gubahan ba loh ra' bwiinn duhlda duxa ra' chi, pwihs i bat'i dxiloh sto' ba loh guelrza'cazzi xteenn garaa ra' cohsa dxaaba ra' nin bwi'hnn ra' bwiinn ra' chi dxyih cun dxyih, nin bwa'haloh ba cun nin bihn dxiahga ba. <sup>9</sup>Pwihs i banaann Dxiohs xa rahcanee Ñi'h la'h ra' bwiinn nin riu'n ntriehgu la'h ra' ñi'h loh Dxiohs cun gaduhbi sto' ra' ba ya ruta'h Ñi'h la'h ra' ba loh guelrza'cazzi nin cadii'dxi ra' ba, nee banaann za Dxiohs xa gusa'cazzi Ñi'h la'h ra' bwiinn duhlda chin gadzihnyi dxyih nin guunn Ñi'h guelguxchisi xcweenta ra' ba.

<sup>10</sup>Dxiohs zudi'hi Ñi'h guelrza'cazzi roo' la'h ra' bwiinn ra' nin ruzo'badxiahga loh ziga xclaa'dzi tihx i ra' ba nee cun bwiinn ra' nin rre'caa ra' loh xquelrnabwa' Dxiohs. Naa ra' ba bwiinn sto' radxiipa ra', bwiinn nahda duxa ra'; ayi rdxyihbi ra' ba rza'bi rwaa' ra' ba rñi'yah ra'

ba loh xquelbacha'h xtenn aanjla ra',  
 11 nicala ziga aanjla ra' nin nahpa ra'  
 ziroo' jweersi nee guelnabwa' za  
 per ayi riaalla ra' ba guti'dxisuu ra'  
 ba tuhbi dxyi'dxyinah nez delanta  
 loh Dxiohs pur xcweenta bwiinn rii'.

12 Per la'h ra' bwiinn ra' nin  
 zeezahnee dzi'n dxaaba ra' naa  
 ra' ba ziga zi guidxa'h ra' nin ayi  
 xquelrihn ra' ñi'h, ya cabweeza  
 chi'h zi ra' ba chyu guina'zu la'h  
 ra' ba para gachi ra' ba. Rñi'yah  
 ra' ba nin ayi rahcabwa' la'gahca  
 ra' ba, per zahchi ra' ba ziga  
 gahca rahchi ra' guidxa'h ra'.

13 Nahpa ra' ba duhlda, ni'chin  
 ziñihchiloh ra' ba; zidi'i'dxi ra' ba  
 loh guelrza'cazii duxa pur xcweenta  
 xtuhlda ra' ba. La'h ra' ba nin naa  
 xcuuxta ra' ba guunn ra' ba pur  
 lañihroo' ra' garaa dxyih, nee naa  
 ra' ba tuhbi cohsa dximma nin ayi  
 rarahtii' nee dxyigah riuu' nasaa  
 sto' ra' ba ruguee' ra' ba la'htu  
 loh nin cayahca lañih cun loh nin  
 cayahnree ra' ba la'htu.

14 Ayi nuu gwa'ha ra' ba loh tuhbi  
 gunna'h lwehgu xclaa'dzi ra' ba  
 guidxa'ga ra' ba la'h gunna'h chi;  
 ayi riagadxahga ra' ba cun xtuhlda  
 ra' ba, nee rca'ha mahn za ra' ba  
 ziga rsiaaba duhlda ra' ba la'h  
 ra' bwiinn nin ayi ruhnn dzi'tsi  
 xigaaba ra' ñi'h; ruluu'yi lasto' ra'  
 ba tin sa'bi sto' ra' ba mweeyi, ya  
 la'h ra' ba nin naa ra' llii'n nin nuu  
 dii. 15 Pwihsí gule'he sto' ra' ba  
 neziuh za'ca, mahzi zeena'hla ra' ba  
 ziga bwi'hnn guehtu Balaam, llii'n  
 Beor, nin guclaa'dzi ñuhnn gahn  
 mweeyi loh nin ñuhnn ba dzi'n  
 dxaaba ra'. 16 Ya bina'zu ba loh  
 xtuhlda ba pur tuhbi buhrra nin

guñi' loh ba ziga rñi' tuhbi bwiinn  
 ya ayi ru basaa'n buhrra chi ñazah  
 ba loh lligaaba yo'ba nin guyuu' ba.

17 Bwiinn ra' squii' naa ra' ba  
 ziga zi tuhbi bizee nin ayi xi ñihsa  
 nuu, o ziga xcahyi nin riahca  
 bwihsí. Pwihsí ya naa ra' ba para  
 tiidxi ra' ba guelrza'cazii para  
 tu'pazi hasta nacahyi duxa, 18 laasii  
 ruluu'yi ra' ba ziga zi dxyi'dxyi nin  
 ruluu'yi guchii nee ayi naa ra'n  
 guchii sino que ganaalla dxyi'dxyi  
 dxixi'hw zohba rwaal' ra' ba. Ya pur  
 xcweenta ra' xica xtsi'n dxaaba ra'  
 ba cun xica lligaaba xteenn tihsí  
 ra' ba rusi'naahan la'h ra' bwiinn  
 nin gue'du bwi'hnn gahn baria'caa  
 ra' loh ra' bwiinn ra' nin nabahan  
 ra' loh dzi'n dxaaba ra', 19 nee  
 rahbi ra' ba loh ra' bwiinn: "Zahca  
 guunn tu nin chi'h zi guiclaadzi  
 tu guunn tu dela guzo'badxiahga  
 tu xchi'dxyi nu", per la'hgahca  
 ra' ba nin naa ra' ba nin yi'bido'h  
 ñaa'-naa ra' ñi'h loh duhlda;  
 pwihsí cada tuhbigah ra' bwiinn  
 naa ra' ba ziga nin gudoo' loh nin  
 bwi'hnn gahn basie'wbacaala yihca  
 ra' ba. 20 Pwihsí bwiinn ra' nin ba  
 biu'nbwa' ra' la'h Daada Jesucristu  
 pur xcweenta xchi'dxyi Ñi'h, ya  
 gula'h ra' ba loh ra' cohsa duhlda  
 ra' xteenn guidxyiyuh; per sidela  
 la'htu gabia'garii tu loh xcweenta  
 dzi'n duhlda ra' stuhbi, pwihsí  
 mahzi nalaasa ru gaca xcweenta  
 tu loh ziga galoh. 21 Pwihsí pwehda  
 mahzi bwen ñahca xcweenta ra'  
 ba ayi ñiu'nbwa' ra' ba xchi'dxyi  
 Dxiohs xlawaa'ha biu'nbwa' ra' ban  
 nee cabwe'he sto' ra' ba xchi'dxyi  
 saantu xteenn Dxiohs nin guya'zi  
 dxiahga ra' ba loh mwer dxyih

nin bihnn ra' ban. <sup>22</sup>Per guyaloh guzohba dxyi'dxyi xcweenta ra' bwiinn chi nin rñi' squii': "Tubhi bwehcu rbia'garii ma loh xquelrdzii'ba ma, ya cuuchi nin gue'du guhza rbia'garii rugu'chi bwehn ma la'h ma loh bwehn."

**Xcweenta chin guibia'garii Jesucristu**

**3** Pwihsí bwiitsi ra'n, dee naa nin raroopa dxihtsi nin cagu'neezahn para la'htu, tin cayuh'nnahn ziga dxiagannasto' tu tin cheezah za'ca tu loh xchi'dxyi Dxiohs nin guhca biñih sto' tu. <sup>2</sup>Gulgasannah sto' tu xcweenta dxyi'dxyi ra' nin guñi' guehtu daada ra' nin guñi' xchi'dxyi Dxiohs cachieempa roo' duxa, neezaa dxyi'dxyi nin guñi' Daada Jesucristu nin baluu'yi ra' xpooxtla Ñi'h la'htu.

<sup>3</sup>Pwihsí gulgaahpa dzi'tsi dee ra' sto' tu: La'n dxyih luulchima ra' nin la'h guidxyiyuh gaduhbi, zi' ra' bwiinn ra' nin guibahan la'n dxyih ra' chi cun cweenta gahca ziga xclaa'dzi tihxí ra' ba, cun zullihdzinee ra' ba xcweenta xchi'dxyi Dxiohs, <sup>4</sup>ya zinaaba dxyi'dxyi ra' ba loh tu: "¿Xixnaa ayi xi rsohn dxi' Crixtu ziga bia'han dxyi'dxyi? Pwihsí desde chin guhchi ra' xtaada guldoon' ra' nu'h, garaatii' zeezah gahca ayi xi galuu'yi xi stuhbi gaca desde chin gurihxchih guidxyiyuh." <sup>5</sup>Bwiinn ra' chi ayi xclaa'dzi ra' ba gacabwa' ra' ba, la'n naa la desde chiempa roo' bwi'hnncha'yi Dxiohs llaa'ndxibaa' pur xchi'dxyi Ñi'h, nee pur xchi'dxyi Dxiohs za guhcacha'yi

loh guidxyiyuh nee gubi'hyi ñihsa loh guidxyiyuh. <sup>6</sup>Chi'chi guñihchiloh garaatii' ra' bwiinn ra' nin gurih loh guidxyiyuh chin biaaba tuhbi ñihsadxiah xihn nin bañihchiloh la'h ra' ba. <sup>7</sup>Per dxibaa' cun guidxyiyuh nin naa nnah, zaduhbin cun dxih pur la'hgahca xchi'dxyi Dxiohs; dxih chi guca'dxihih la'han loh dxyih nin gaca jwisi, chin guñihchiloh Dxiohs la'h ra' bwiinn duhlda ra'!

<sup>8</sup>Nee bwiitsi ra'n, ayi dxia'lida sto' tu para la'h Daada Jesucristu, tuhbi dxi'h dxyih naa ziga tuhbi mihyi yihza ya tuhbi mihyi yihza naa ziga zi tuhbi dxi'h dxyih para la'h Ñi'h. <sup>9</sup>Dxiohs ayi cayahcanagahn dxi'h para guza'loh xchi'dxyi Ñi'h ziga ruhnn nuu ra' bwiinn lligaaba, sino que paseensi si cayahpa Ñi'h la'h ra' nu'h, laasii ayi xclaa'dzi Ñi'h nin tuhbi bwiinn ñichiloh sino que garaa ra' ba guzee ra' ba para dxibaa'.

<sup>10</sup>Per dxyih nin dxi' Jesucristu stuhbi zahcan ziga zi chin radzihh tuhbi guba'n nin ayi nuu dxyi'dxyi tii' radzihh, ya chi'chi zica'dxihi llaa'ndxibaa' cun garaa nin za'bi lohon cun tuhbi bwihih duxa nin guunn guidxyihbi duxa ra' bwiinn, ya guidxyiyuh cun garaa ra' nin rii chi'h zi loh guidxyiyuh zica'dxihi ra'n.

<sup>11</sup>Laasii garaa ra' dee' ra' ziñihchiloh ra'n, ni'chin la'htu gulguibahan nayaah loh guidxyiyuh rii', ayi gaca tu bwiinn duhlda.

<sup>12</sup>Gulcwehza nee gulgui'hnn para dxiooba gadzihh dxyih chi'h zi nin guunn Dxiohs lligaaba dxi' Ñi'h. Pwihsí dxyih chi ziñihchiloh

llaa'ndxibaa' cun dxih, ya garaa  
nin rachidia'ha ra' nu'h nez  
llaa'ndxibaa' zica'dxih ra'n, bu'hu  
zi dxiaca ra'n,<sup>13</sup> per la'hnu'h nin  
cabweeza nu'h gadzihn dxyih  
nin dxiinloh dxibaa' nacuubi  
nee loh guidxyiyuh nacuubi nin  
bia'han dxyi'dxyinee Dxiohs loh  
nu'h gachica'ha nu'h, hasta gaca  
ganaalla si dzi'n za'ca nee ayi  
chu'tii' nin tuhbi duhlda.

<sup>14</sup>Pwihs i ni'chin bwiitsi ra'n, loh  
gaduhbi nin cabweeza ra' nu'h  
cohsa ra' rii'; gulgui'hnn ziga  
xclaa'dzi Dxiohs tin zi'chi gwa'ha  
Ñi'h la'htu guchii naa tu bwiinn  
nin riidxyii sto' ra' ñi'h cun  
xcweenta xchi'dxyi Ñi'h, sin nin  
tuhbi xilla cohsa dxaaba, cohsa  
duhlda. <sup>15</sup>Gulgahpa cweenta  
xcweenta paseensi nin nahpa  
Daada Jesucristu cun la'hnu'h,  
ni'chi naa ziga ta'h nu'h loh duhlda.  
Pwihs i zi'chi za baca'h bwihtsi  
dzi'tsi nu'h Pahblu xcweenta ziga  
badi'hi Dxiohs guelnasiin la'h ba.

<sup>16</sup>Garaa ra' loh dxihtsi nin baca'h  
ba guñi' ba garaa ra' dxyi'dxyi ra'  
rii', nicala nuu ra' dxyi'dxyi ra' chi  
nagahn ra'n para gacabwa! lu'hn,  
per bwiinn ra' nin gullia'y'i'hn  
rahcabwa!, bwiinn nin ruhnn  
chiohpa sto' ra' ñi'h, bwiinn ra'  
nin ruxi'dxi ra' loh xchi'dxyi Ñi'h,  
squii'gahcaza ruhnn ra' ba loh  
garaatii' xchi'dxyi Dxiohs, ni'chin  
ziñihchiloh ra' ba.

<sup>17</sup>Ni'chin bwiitsi ra'n, yaque la'htu  
naann tu xcweenta dxyi'dxyi ra'  
rii', gulgahca nasiin tin ayi dxiaaba  
tu loh guelrusagui'hi xteenn  
ra' bwiinn ra' nin ayi xclaa'dzi  
guzo'badxiahga xchi'dxyi Dxiohs,  
tin ayi guñihchi tu ziga zeezah  
dzi'tsi tu loh xchi'dxyi Dxiohs nin  
zeezahnee tu. <sup>18</sup>Ni'chin mahzi  
cha'y i gulchezah guldxiu'nbwa'  
la'h Daada Jesucristu nee gulchioo'  
ru loh xquelnaza'ca xteenn Ñi'h.  
Pwihs i ba za'bi dxyi'dxyi para  
la'h Ñi'h nnah nee para gaduhbi  
chieempa tii!! Zi'chi gaca pwihs i.